

Presentacion di buki di Poesia "Vogelvlucht"



ORANJESTAD (AAN): Informe di Hulanda ta indica cu na Cas di Aruba e tuma lugar den presencia di Minister Plenipotenciario sr. Edwin Abath y señora Dynia Abath Muller presentacion di e buki di poesia "Vogelvlucht", skirbi pa Giselle Ecury. Tambe presente na e ocasion aki tabata Minister Plenipotenciario di Curaçao sr. Seldry Osepa, Minister Plenipotenciario di St. Maarten sr. Mathias Voges y demas invitadonan entre nan sr. Hubert Maduro, miembro di Raad van State y director di Cas di Curaçao sr. Robert Candelaria.

E programa a cuminsa unda Frank de Rijk, representantie di cas editorial "In de Knipscheer", a tene un entrevista cu Giselle Ecury. Durante e entrevista Giselle a conta ariba su inspiracion pa skirbi y cu esaki cuminsa di tempo cu e tabata chiquito y cu e tabata mira su mama ta skirbi carta. Un aspecto cu ta bisto den su novela y poesianan ta e islanan Aruba y Curaçao di cual islanan Giselle a conoce bon prome cu el a bin biba na Hulanda.

Despues di e entrevista Giselle a declama algun poesia for di su buki "Vogelvlucht". Ray Mohan a canta un poesia di Edgar Cairo, di cua su pintura a keda usa ariba e portada di e buki.

Giselle Ecury a haci entrega di e prome ehemplar di "Vogelvlucht" na señora Dynia Abath-Muller, esposa di Minister Plenipotenciario Edwin Abath. Señora Abath a bisa di ta sintie honra pa ricibi e prome ehemplar di e buki for di man di e escritora. 'Mescos cu tur esnan presenta awe tardi mi ta gradicibo cu constantemente bo ta transpasa un pida di Aruba y Curaçao y e calor di nos islanan na e lesadornan atrabez di bo novela y poesianan. Pa esey nos ta masha gradicido na bo, asina señora Dynia Abath-Muller a bisa.

Giselle a gradici Minister Plenipotenciario sr. Edwin Abath, Cas di Aruba y tambe tur hende cu a haci e presentacion posibel.

Na final tabata tin oportunidad pa esnan presente cumpra un ehemplar di e buki cu firma di e escritor.